

Paulo remimombe'ukwe

Tessalônica tetã mygwa pegwarã 2

segunda epístola de Paulo aos tessalonicenses

Paulo inhirũ ave omondo jevy Tessalônica tetã mygwa-pe onhe'ẽ kwatia-rehe

1 ¹Hesu reroviaha Tessalônica tetã-my oiko va'e. Ore Paulo, Silvano, Timóteo ave oromondo-ta peẽ-my ore nhe'ẽ. Kwatia-rehe oromondo-ta. Peẽ katu Nhandejáry Nhande Ru tee va'e rehegwa, Nhandejáry Hesu Cristo re'yí ave. ²Tapende rovasa katu pende rexakwaa rei-vy Nhandejáry Nhande Ru tee va'e. Tapende rexakwaa rei katu Nhandejáry Hesu Cristo ave. Tapene mbopy'agwapy katu ave.

Ojehexa uka jevy va'erã Nhandejáry Hesu

³Ha peẽ katu, ore re'yí kwéry, perovia porãve rãve katu peho-vy Nhandejáry-pe. Pejohayhu porãve rãve katu pekwa-vy ave. Pende rovasa porã-gwi orotima Nhandejáry-pe pende-rehe kwéry. Naiporãi orotima e'yí ramo Nhandejáry-pe. “Nhatima porã meme katu Nhandejáry-pe hese kwéry” oro'e ro'e pende-rehe kwéry. ⁴Perovia porã-gwi, pejohayhu porã-gwi ave, heta oronhe'ẽ porã pende-rehe. Hesu reroviaha ojogweroaty haty haty-rupi gwive heta oronhe'ẽ porã meme pende-rehe oromboete-vy. “Hekoha porã porã voi” oro'e pende-rehe kwéry. “Ojerereko asy ramo jepe, ohasa asy ramo jepe, Nhandejáry rape-gwi katu ndojeréi voi. Ogwerovia joty kuri” oro'e pende-rehe oromboete-vy. ⁵Áy peiko asy Nhandejáry ra'arõ-vy. Ha Nhandejáry oipota peiko asy ramo, perovia tee joty íxupe. Upe rire pegwahẽ ramo Nhandejáry oiko ha-py, pende ruvixa oiko ha-py pegwahẽ ramo, napemonhemotĩ motĩry va'erã íxupe perovia tee-gwi. Upéixa voi Nhandejáry ohexa uka-ta gwekoha porã. ⁶Ojehexa uka jevy ramo Nhandejáry Hesu, nde repy va'erã voi Nhandejáry. Ne moingo asyhare-pe katu omoingo asy ave va'erã. Upéixa voi Nhandejáry ohexa uka va'erã gwekoha porã. ⁷Erehasa asy rire, nane

mbohasa asy ukavéi-ma va'erã. Ha ore-vy ave nore mbohasa asy ukavéi-ma va'erã. Áry-rehe ojehexa uka ramo Nhandejáry Hesu, nanhane mbohasa asy ukavéi va'erã. Nhandejáry Hesu ojehexa uka va'erã gwembigwái mbaraete va'e ndive. ⁸Hendy mbaraete tee reheve ojehexa uka va'erã. Ogwahê ramo, ombohasa asy va'erã Nhandejáry kwaa e'yha-pe. Hesegwa nhe'ê porã rendu e'yha-pe ombohasa asy va'erã ave. ⁹Omboyke va'erã mombyry imondo-vy ojéhegwi. Opa hagwã-pyma omondo va'erã inhe'ê rendu e'yha gwive. Ndou mo'ávêi-ma Hesu rexa-vy. Opu'aka teha reheve mburuvixagwasu tee-rami ojehexa uka ramo, ndohexa mo'ávêi-ma íxupe hikwái. ¹⁰Ha upe va'e áry-py ogwahê ramo Nhandejáry Hesu, omboete va'erã íxupe he'yí kwéry. Ojerovia va'e gwive hese, “Nde tuvixa mba'e va'e voi nde” he'i va'erã Nhandejáry Hesu-pe imomba'egwasu-vy. Ha peê ave hese ojerovia va'e gwive pa'ü-my peí va'erã. Ore remimombe'u perovia-gwi peí va'erã upe-py, he'yí kwéry pa'ü-rupi. ¹¹Upéa-rehe oromondo meme va'e Nhandejáry-pe ore nhe'ê. Pende-rehe oromondo. Pende pe'a va'ekwe Nhandejáry peiko hagwã heko-rupi. Upéa-gwi orojerure rure íxupe pene mombaraete hagwã peiko hagwã heko-rupi onhemotí e'y hagwã pendéhegwi. Ha pende rekoha porãse ko peê. Tapene mombaraete katu pende rekoha porãve rãve hagwã, perovia porãve rãve hagwã, pene rembiapo porã porã meme hagwã. ¹²Pene rembiapo porã ohexa ramo, omomba'egwasu va'erã Nhandejáry Hesu-pe héry mboete-vy. “Hesu réry iporã ete” he'i va'erã. Pene mboete va'erã ave. Héry-py peí va'e tuvixa mba'e ko Nhandejáry-pe. Nhandejáry ko pende rovasa va'e voi. Pende rexakwaa rei va'e voi ave Nhandejáry Hesu Cristo. Upéa-gwi pene mboete va'erã. Nhandejáry-pe pemboete va'erã ave. Upéa-rehe tapende rovasa vasa katu Nhandejáry.

Pe hekoha vaive eterei va'e ojekwaa ranhe va'erã

2 ¹⁻²Áy oromombe'u-ta peê-my, xe re'yí kwéry, kwatia-rehe Nhandejáry Hesu Cristo ou jevytaha rehegwa nhe'ê. Gwupive nhande rerahapa hagwã outaha rehegwa nhe'ê oromombe'u-ta. Oí pene pa'ü-my omombe'u va'e mo'ã peê-my. Ani penhemoakã rasy uka rei teí íxupe. “Ma'erã ereha'arõ joty Hesu outaha áry? Ogwahê-ma voi” he'i mo'ã va'erã peê-my. Xe ndaipotáí voi perovia inhe'ê, ore re'yí kwéry. Ani pene mbopy'a reraha rei, omombe'u-vy mo'ã peê-my upéa nhe'ê. Oí he'i va'e, “Nhe'ê Marangatu tee va'e ko omombe'u nhande-vy upéa nhe'ê” he'i mo'ã. Oí he'i va'e, “Kóixa voi Paulo remimombe'u” he'i mo'ã. Oí he'i va'e, “Upéa nhe'ê Paulo omoí va'ekwe kwatia-rehe” he'i mo'ã.^a ³Upéixa omombe'u ramo, ani pene mbotavy uka rei va'erã. Áy ete katu nogwahê mo'ãí Nhandejáry áry igwejy hagwã. Kente kwéry yvypóry va'e gwive ojere ranhe va'erã Nhandejáry rekoha-gwi. Ojekwaa ranhe va'erã pe hekoha vaive eterei va'e, anháy ruvixa Satanás rembieraharã. Upe rire ae katu ogwejy va'erã ou-vy Nhandejáry Hesu. ⁴Ha pe hekoha vaive eterei va'e voi ojekwaa ranhe va'erã. Opaixagwa tupã tee-pe, tupã ra'anga-pe ave ndoipotavéí omboeteve íxupe.

^a 2.1-2 1 Jo 2.18-19

Enterovéa remimboete gwive ndoipotavéi omboeteve. “Xe-vy mante xe mboete katu. Anive eremboete teĩ tupãve” he’i va’erã. Oipota va’erã ojeupéte omboeteve. Oike va’erã Nhandejáry róga kakwaa-py ogwapy hagwã onhemonhandejáry ra’anga anga-vy. “Xe katu Nhandejáry” he’i mo’ã va’erã ójehe.^b

⁵Ma’erã po nde resarái nde-vy amombe’u va’ekwe-gwi. Pene pa’ü-my xe aiko ramo amombe’upa porã-ma va’ekwe peẽ-my.^c ⁶Ha pe hekoha vaive eterei va’e katu ne’írá ojekwaa. Hi’áry-py ae ogwahê va’erã. Anga ete ndojekwaa mo’ái. Oi ijokoha. Mba’eixagwa po upe va’e peikwaa voi. Amombe’u va’ekwe-gwi peẽ peikwaa voi. Peikwaa-ma voi-gwi peẽ, namombe’u mo’ávêi-ma peẽ-my.⁷ Áy nhemi nhemi ha-py hembiaipo vai. Oi ijokoha. Nombojekwaa ukái pe hekoha vai va’e. Upe rire oipe’a va’erã ijokoha Nhandejáry. ⁸Oipe’a rire ae ojehexa uka porã va’erã ivai va’e. Upe va’e hekoha vai va’e ojekwaa ramo, ombaraete reheve ou va’erã Nhandejáry Hesu. Ojehexa uka porã arã ou-vy. Ou-ma ramo ojuka va’erã pe hekoha vai va’e-pe. Pytu-py ojuka va’erã íxupe.^d ⁹Upe va’e hekoha vai va’e ojekwaa va’erã anháy ruvixa Satanás nhe’ê-rupi. Nhandejáry Hesu ou e’ý mboyye, Nhandejáry rembiaipo porã oha’ã a’ã oiko-vy va’erã. Hembiaipo porã ra’anga anga rei va’erã oiko-vy. Opaixagwa nhane rembiexa e’ý va’e ojapo va’erã. Oipota, “Nhandejáry” he’i mo’ã hese kente kwéry. Omopondera uka uka va’erã ójehe iporombotavy-vy. ¹⁰Nainheresendehái va’e-pe ombotavy va’erã. Opaixagwa ivai va’e ojapo va’erã ombotavy-vy. Upéa, Hesu-rehe ojerovia e’ý va’e, ohendu ramo anhetegwa nhe’ê, nohenduséi voi. “Iporã upéa nhe’ê. Nhahendu katu” nde’íry. Ndoipotái oresende íxupe Nhandejáry. Upéa-gwi noresende mo’ái íxupe kwéry Nhandejáry.^e ¹¹Nohenduséi-gwi nhe’ê porã, pytü-my oiko hagwã Nhandejáry remimondo voi. Ombojevavy uka íxupe ijapu va’e ogwerovia hagwã. ¹²Upéixa ramo Nhandejáry ombohasa asy va’erã anhetegwa nhe’ê ogwerovia e’ý va’e-pe gwive. Entéro ojevavyse va’e gwive, ombohasa asy va’erã íxupe imondo-vy anháy renda-py.

Pende pe’a ranhe va’ekwe Nhandejáry pene resende hagwã

¹³Ha peẽ katu, ore re’ýi kwéry, Nhandejáry Hesu rembihayhu va’e voi. Pende pe’a ranhe va’ekwe kente kwéry pa’ü-gwi Nhandejáry pene resende hagwã. Omopotimba-ma ramo pende py’a Nhe’ê Marangatu tee va’e, perovia-ma ramo inhe’ê anhetegwa va’e, pene resende voi va’ekwe Nhandejáry. Upéa-gwi orotima porã porã meme Nhandejáry-pe pende-rehe. Naiporái voi orotima e’ý íxupe. ¹⁴Pende poravo va’ekwe ojave gwarã peiko hagwã, perovia-ma ramo Hesu rehegwa nhe’ê porã, ore remimombe’ukwe peẽ-my. Pende poravo va’ekwe penhemomba’e hagwã peẽ-my gwarã, Nhandejáry Hesu Cristo ome’ê peẽ-my va’erã-rehe hendive peiko ramo. Iporãmba meme voi Nhandejáry Hesu onhemomba’egwasu ete ha-py. Upe-py peẽ pemoirü va’erã íxupe. ¹⁵Upéa-gwi peẽ, ore re’ýi kwéry, anike pejere teĩ Nhandejáry rekoha-gwi. Perovia tee meme katu upe va’e nhe’ê anhetegwa va’e. Ani katu pemboyke teĩ pendéhegwi ore

^b 2.3-4 Dn 11.36 ^c 2.5 Rm 1.21-25 ^d 2.8 Is 11.4 ^e 2.9-10 Mt 24.24

remimombe'tukwe. Anhemonhe'ẽ va'ekwe peẽ-my pene pa'ũ-my aime ramo va'ekwe. Kwatia ahai va'ekwe peẽ-my ave. Upéa nhe'ẽ-rupi gwive peiko meme katu peẽ. ¹⁶Ha Nhandejáry Hesu Cristo katu, Nhandejáry Nhande Ru tee va'e ave tapende rovasa porã katu. Ha'e nhande rayhu va'ekwe, nhande rexakwaa rei va'ekwe ave, nhane mbopy'agwasu meme voi va'ekwe. “Xe ra'arõ tee katu. Xe katu napombotavy mo'ãiry” he'i va'ekwe nhande-vy. ¹⁷Tapene mbopy'agwasu katu Nhandejáry. Tapene mombaraete katu Nhandejáry pene mbopy'agwapy-vy iporã va'e gwive pejapo hagwã, nhe'ẽ porã porã va'e gwive pemombe'u hagwã.

Pejapo katu oração Nhandejáry-pe ore-rehe

3 ¹Ne'írá opa ore nhe'ẽ. Oromombe'u-ta vyteri, ore re'yí kwéry. ãy orojerure-ta peẽ-my: “Pejapo katu oração Nhandejáry-pe ore-rehe, opa-rupi pya'e osarambi hagwã Nhandejáry Hesu rehegwa nhe'ẽ, enterove omboete hagwã inhe'ẽ”. Upéixa voi ogwahẽ va'ekwe peẽ-my inhe'ẽ. ²Ha inhe'ẽ renduha gwive ndogwerojojái herovia-vy. Oĩ tekoha-rupi e'y oiko va'e, hekoha vai va'e ave. Upéa-rehe pejerure Nhandejáry-pe íxugwi ore resende hagwã. ³Ha Nhandejáry Hesu katu nhane mbotavy e'y va'e. He'i va'e gwive anhetegwa meme voi. Pene mombaraete va'erã. Upéa anháy ruvixa-gwi pene resende va'erã. ⁴Ha'e katu ore mbojerovia va'e pende-rehe kwéry. Penhepyrũ porã heraha-vy. Ore remimombe'u peẽ-my ndapeheja reíry va'erã. Pejapo meme joty va'erã. Orojerovia-ma voi pende-rehe. Hendive peiko jave orojerovia-ma pende-rehe. ⁵Tapene mbopy'apyhy katu Nhandejáry Hesu peikwaa porã hagwã Nhandejáry pende rayhuha, pejere e'y hagwã íxugwi. Hesu Cristo ojere e'y hagwe-rami joty, ani pejere.

Tomba'apo ogana hagwã ójehe

(1 Ts 4.11-12; Ef 4.28-29)

⁶Hesu reroviaha jepe oĩ ipituva va'e. Ndojaposéi mba'eve. Nohendúiry oro'e va'ekwe. Oromanda peẽ-my, ore re'yí kwéry. Nhandejáry Hesu Cristo réry-py oromanda. Ani pemoirũ íxupe kwéry. ⁷⁻⁸Ha oroiko ramo pene ndive va'ekwe ndore pituváiry va'ekwe ore. Iporã peiko ore oroiko hagwe-rami. Upe va'e peikwaa voi. Oropaga paga va'e ore remi'urã-rehe. Ndorokaru reíry. Ha oromba'apo hatã hatã ae katu oroiko-vy ore mbaraete reheve. Ore kane'õ ramo jepe oromba'apo joty. Áry pyhare ave oromba'apo oroiko-vy ponóike ipohýi eterei avave-pe ore remi'urã ome'ẽ ramo. ⁹Upéixa ramo oromba'apo ore oroiko hagwe-rami peiko hagwã. “Xe nhe'ẽ mombe'uháry-pe iporã ereme'ẽ rei ho'u va'erã” he'i va'ekwe Nhandejáry. Ha ore ae katu oromba'apo joty orokaru hagwã, ore oroiko hagwe-rami ave peẽ peiko hagwã. ¹⁰Oroiko ramo pene ndive va'ekwe, “Gwĩ omba'apose e'y va'e gwive tokaru e'y jepe” oro'e kuri peẽ-my. ¹¹Onhemombe'u ore-vy: “Ipa'ũ-my oĩ omba'apo e'y va'e, ipituva va'e. Oĩ omoakárasy rei va'e gwapixa-pe” he'i pende-rehe. Upe va'e-pe oromondo-ta ore nhe'ẽ, “Toiko tekoha-rupi. Tomba'apo ogana hagwã ójehe” oro'e. ¹²Nhandejáry Hesu Cristo réry-py oronhemonhe'ẽ

íxupe omba'apo hagwã. Tekoha-rupi oiko hagwã, gwembi'u repyrã-rehe omba'apo hagwã oromanda íxupe. ¹³Ha peẽ katu, ore re'ýi kwéry, ani peje teĩ, “Xe kwerái-ma, naxe retea'evéi-ma xe rembiapo porã porã-gwi” ani peje teĩ. Ha peje ae, “Xe rapixa nopenái ramo jepe, ajapo porã porã-ta joty íxupe” peje ae. ¹⁴Oĩ para'e pene pa'ũ-my ohendu e'ỹ va'erã xe nhe'ẽ, xe remimondo peẽ-my ko kwatia-rehe amói va'e. Upe va'e ohendu e'ỹ va'e, ani teĩ pemoirũ íxupe. Peje Hesu reroviaha-pe: “Eheja ha'e anho ranhe toiko onhemotĩ hagwã” peje. ¹⁵Ha nde a'e'ỹha-rami ani erereko. Nde ryvy-rami ae ereko íxupe. Enhemonhe'ẽ porã katu íxupe ohendu hagwã xe nhe'ẽ. ¹⁶Ha Nhandejáry Hesu nhane mbopy'agwapy va'e voi. Tapene mbopy'agwapy joa meme kena. Ojehu ramo jepe mba'e, tapene mbopy'agwapy porã joty. Toiko meme pene ndive kwéry Nhandejáry Hesu. ¹⁷Áy xe tee-ma a-rami ahai: “Xe Paulo xe resã. Peẽ pene resã tipo ave?” ha'e-ta peẽ-my. Upéixa meme ahai amói-vy kwatia tia-rehe xe réry pehexa ramo, “Paulo nhe'ẽ tee voi nipo ra'e upe va'e” peje va'erã. ¹⁸Tapende rexakwaa rei katu Nhandejáry Hesu Cristo pende rovasa porã-vy.